

غير قابل للمزيج

للشاعر/

محمد دانيال

إهداء

الإهداء ..

ل سكتي وسكتي أمي ..

وأبويما الضهر ..

وأخويا الحس ف الدنيا

وللثورة .. وللشهداء بدون فرقة

وللفرقة ف سنة أولى و مدرستي

ورحمة .. موسيقى الحب اللي بكتني

وفتحت ليا باب الشعر

ل عمرو إسماعيل .. الإشارة اللي مشتني ف السكة الصح

لشط أبوهيف ..

ولكل شارع حزن

لب ي ر م وس ي د

و صحابي الشعراء ف مجتمعه

ول أحمد قيتو رفيق الدرب
لمريم حسام السند ..
ول أحمد عبيدو ف الإختيار
ولكل الناس اللي بتقرالي ومؤمنة بيا
ولكل حد هيقرأ الديوان ده
شكر ١ ...

محمد دانيال

وَبَعْدَ هـَ اِلِك
فَ بَ بَعْدَ هـَ اِلِ
ك

تَ هـَ اِلِ يَ تَ اَز
يَ وَايَ غَ لَطَ ة
هَاعَدَ يَهْ اِلِك

آخر مطر ف باريس

كان ليل ف مارس
تحت سقف باريس
آخر مطر بيودع الأموات
وأول سيجارة أشربها مع كونياك
كنتي إنتي واقفة هناك
بتغازلي فاطمة الورد
حاضنك جاك م الصوف
ياويكي وقت البرد
وحاضنِّي عرق الشوق
وحرارة الصدفة
كل الصور واقفة ..
وانتي بتتمايلي
عمالة تتحايلي

على نجمة تشبهلك
وأنا كنت بندهلك
بالنبض ماسمعتيش
رجلي اللي عجزت ف الحراك نخبت
ماملكش أروحلك ..
أو أبوحلك بالوفاء
بذكر فراق كان بينا ف السابق
وأعمل سباق بين عقلي والدقة
سبق إنِّي قولت أبقي ..
رديتي مش هابقي
وطويتني فصل الحلم ف الآتي
سيبتني أكمل وحدي ف حياتي
ماملكش غير كونياك
وباريس ف وقت المطر
أنا شخص عاش الخطر...
مرمي ف بحر الزيف

خدتي الربيع م الروح ...
ف اتحولت لخريف
أسف على التخريف
مش مالك الأعذار
هذا إنكسار مارس
لا انتي فتاة الحلم ...
ولا حتى انا الفارس
انا شخص بيمارس
عادة البكا من الروح
لا يملك انه يبوح ...
سوى فيه ظلام غرفته
كل البشر عرفته ...
من خوف بيان واضح
قلبه الحزين فاضح ..
معنى الوجع جواه
ماملكش غير ذكرى ..

بتصاحب المعانآه
وبراند مع كونياك ..
والوقفه على ناصية
إشارات في شانزليزيه
ماعرفش ليه ..
فتحت عيني المحك
لجل إنِّي أستسمحك ..
تديني من وقتك
لو حتى بعض حنان
لكن لقيت دخان ..
ف سجارة متغرقة
وماشوفتكيش الا ..
ف خيال كثيف ف الهوا
فوقت و لقيتني وحيد
والناس جميعا سوا ..
وإنتي بعيد جد اء ..

بعيد كالعادة مش جاية
أدركت أنا واللحظة كات حية
أغلب ليالي باريس
بتكون كثير ظالمة
وإن السجاير خلطت النيكوتين
بدموع وبعض حنين
وإن المطر ف باريس
بيخلي روحنا تبوش
ماقبلتكيش لكن ..
كونياك باريس مغشوش

مسيبتش حاجة للذكرى

ما سيبتش حاجة للذكرى
تكونلي شفيعة بعد ممات
رفات التربة لو ينطق
يقول كان شخص عاصي حزين
وكان واحد ...
بيكره لمة الصحبة
يمل الحب ويهيئه
كتير م الخلق شايفينه
بطبعه كئيب مالوش ف العيب
لكن دايم بيتجمل
تلاقوا حكايته مسرودة
لكل وشوش
ماسيبتش حاجة للذكرى
عشان الناس مايستاهلوش

ولما هبوش..

تلاقوا إن اللي باقي ف عمري مش كامل

يجوز قضيته بتساهل

قميصي الاسود السادة...

يليق على لوني من جوة

ملايح شخص مش هو

بيعكس لونه عالناج...

يشوف الدنيا نفس اللون

وصلت لسن مش محسوب..

بيمحي الماضي يوم ورا يوم

ف أقرر أصوم

وأعيد الوحدة ب ظروفها...

وأواجه جرحها وخوفها

وأنا وهي..

بنستقبل سوا الاحزان

بكل رحاب أنا وهي

بقينا صاحب بنتفاهم
يجوز واهم
يان الوحدة سر الفرح
ب طرح الناس... و طرح الوقت
و طرح الماضي في جزوري
فيبقى طبيعي اكون حاضر
ماحدث حس بحضوري
ولا بتشاف
بموت شفاف
بدون إثبات
ماسيبتش حاجة للذكرى
تكونلي شفيعة بعد ممات
ماسيبتش حاجة للذكرى
تكون من بعدي سيرة روح
ماسيبتش إلا كام صورة
ملامح شخص كله جروح

المذبحة

هاحكيلكوا قصة من خيال الروح
مدبوح ومرمي ع الرصيف ف ميدان
بيعدوا خلق يبصوا على شكلوا
وبيمشوا خوفا منه ومشاكلوا
ويسيبوا بصمة ف كل وقت وحين
وحنين ليالي واغنيات فيروز
هحكيلكوا قصة حكاها شخص عجوز
كان سنه ف العشرين
لكن كما المعتقد
الحزن عشش في مسام جلده
بوش ما باقي من السنين
أصبح مسن
وجدير يحن
لناس ما بيحنوش

وجدير يروح مشي يوميا
وماعند هوش احلام ..
غير كام سيجارة يجوز
منبوذ من الشارع ..
ومن الصحاب
ومن القصايد لما بتراوده ومايكتبهاش
هذا العجوز إن عاش
ف حياته ك الإنعاش ..
في محاولة العيشة
هو صفلكم بيته
مسكن قديم جدا ..
من اوضة لو زرتها
هتחס بالغربة
بما تحتويه من فاضة مركونة ..
وسرير كما التربة
مع كرسي ف البلكون

الكون ف نظره طل
ولكنه فيه مربوط ...
مبسوط ساعات علشان ...
بيلاقي عنده مكان
يستنشق النسمة
مخلوطة بالدخان ..
مع ناس بياخدوا مكان ..
ف بيصبحوا كوكتيل
كوكتيل ثقيل .. زي الحساوي
ف قلب شخص مريض
اما النهاردة وقبل هذا الحدث
خد قلبه على كتفه
ونوى يركب مراكب هوا
ويروح ويرسالها
شال ذكريات على كتفه ومشالها
بصت عليه ب زهرها

وعرفها من شالها
ف جرالها قاصد روجه تتشيك
كان نفسه بس يقولها بحبك
او حتى لمسة ايدها على ايده
لكن عنيتها وقلبها جهلوه
لما الفراق زود ف تجاعيده
بصت عليه وكملت ...
شافها معاه اتثبت
كبت عنيه دموعه ..
والارض مش تحته
اللحظة دي بالظبط ..
كان وقت مدبحته
مات اللي عاش وحده ..
مات وحده زي ما عاش

.....

.....

جوانا طيابة

جوانا طيابة تخلينا
بندمع لما عماد متعب
يظهر ف الكادر
او لما يموت فنان عشرة
او لما بنسمع ف النشرة
عن قتلة ف سوريا وف فلسطين
جوانا طيابة تخلينا
ما احناش شايفين
الدنيا علينا بتتخاذل
ما احناش حاسين
ان احنا تملي بتتنازل
عن كرامتنا
بنخبي الاوجاع ف قلوبنا
لكن ساكتين

جوانا طيابة تخلينا
جوانا خدوش
جوانا حنين وبتتأثر
للبلد اللى زمان زورناها
و للعبة زمان كسرناها ..
ولفرقع لوز
ولصوت فيروز
لو غاب ليومين
ولدولسي اما بنكسب اتنين
جوانا حنين
الى ناس ساييين
جوانا طيابة تخلينا
بنخبي الاوجاع ف قلوبنا
انما ساكتين

عشق صافي

لقيتك عشق صافي حلمت اطوله سنين
معاكي الحظ شاغلني وشاورلي لقيتني بروح
ما بين عينك شطوط خليني اعموم فيهم
قالولي الحب بحرہ بيشفي اي جروح

انا بمدح ما بين الاوليا باسمك
وراسمك ع الحيطان بالنقش
وحالف ان انا ما الجأش

غير ليكي
هخليكي

اميرة بين صبايا الكون
وهاكتبك قصايد ف الغرام ياما
ولو شوفتك غريقة ف حزن
هفصل حضني عوامة
ينجيكي
دموعك تبقى على كفي
شفايفي ضحكة ترويكي
وتفتحلك ببيان الفرح

انا شوفتك
ملاح وردة بين بستان غريبة الشكل
بتخطف نظرة العشمان ف عشق الزهر
تشيل عنه حمل الحزن من ع الزهر
وترسلمه براح ف الجاي
بقيت من بعد ما شوفتك
ما اخافش الليل ولا يبكي
ولا بشكي لحيطان أوضتي عن الغايبين
كفيت من بعد ما شوفتك جميع الناس
زرعت الصبر ف الاحساس ..
مشاعري كلها تجاهك
ولو جاه البلاد عندي
مايكفي نظرتي لجاهك
نويت والنية كات امري
اسلم حضرتك امري
وامد عنيك بسلامي
واوهب ليكي ما شئتني
اوزع عمري ع المخاليق
وانولك بس يا عشيقتي

لخصت ف
ردودك
ورميت سلام
سايب
كل اللي
باقينك
مايعوضوش
غايب

بقيت داير

بقيت داير
بصاحب كل يوم وحدي
ف كرسي جديد على القهوة
وبفضل أعيد ..
عن المواعيد
وازيد عني ..
وعنها ف بعض اوقاتي
بكلمني عن الأتي
وأصدق حاجة ف حياتي ..
بقت ذكرى ما بتسبنيش
ومش درويش ..
لكن مجذوب
ومش زاهد .. لكني بتوب
في وصف قلوب ما بتوفي
و صف الناس ماهوش صفي ..
ومش بعرف اداري عيوب
بصفي الحزن من روعي ..
وافصل توب على قدي
واول غيمة بتعدي ...
ما بتمطرش غير فوق
مرابط فوق جدار شوقي
ورابط ناس كانم طوقي
وعامل نفسي مش نفسي ..
لكن نفسي معنداني

بشوف كل البشر فوقي ..
وانا الداني
نداني الحب ف مشيتله ..
رجعت وقلبي كان محني
بيجرحني الغنا والميل
وسهد الليل يطوحني...
لبحر الهم
نزيف الدم ف عنيا
مالوش كاتمة
هويت القعدة ف العتمة
وعندي مناعة م التجريح
بشكل صريح
بقيت خايف ..
اشوف الضي واجريله
ف يطلع نار
واخاف اختار حاجات...
ما تكونش ليا مقاس
واخاف م الناس ..
وم الاحلام
وخوفت اني احس الحب ..
او اني للبشر أهوى
بقيت داير ..
بصاحب كل يوم وحدي
ف كرسي جديد على القهوة.

ورد ديسمبر

كان ماشي لوحده ف شارع ما
بصلته جنينة بدون كشاف
عرفته من دقنه ومن شكله.
اترمى واتدارى كما العصافير تحت الشجرة
وفضل بيقلب ف مشاكله يسرد للورد..
يضحك للبرد
ويقول يا ديسمبر يا مخبي
ورق الجوابات جوة جيوييه
الليل بقا ظالم ومعبي
من رقع الذكرى ف لون توبه
حببت في ديسمبر
وكمان ف ديسمبر هجتني
البعد يا ورد مموتني
والدمع بذور..
اول ما بينزل على خدي بيبتت تعاوير
هي اللي ف يوم .. باست خدي
ضمتني يا ورد بحضن كبير
كان اول حضن وكان آخر
ودة معنى الحب ف توب ساخر
وجمعنا وفرقنا ديسمبر
الليلة يا ورد..
العام بيمر
وشهور الصيف كان كلها مر

لكن ف الشتا هرومون صاحي بيسمى حنين
فرقنا اتنين..

من بعد ما كنا ف روح دايرة

غابت هي.. لكن سايرة

الهوا بيهفهم ف يقلب م الماضي حاجات

والهاند فري.. بيمل يا ورد الاغنيات

علشان الصبا زايد فيها

شوفتيني يا وردة ضعيف ازاي ؟

دمعتي مش قادر اخببها

ساكت من برة لكن جوة..

فيه دوشة وكم صريخ ماوصفش

ماعرفش يا ورد ..

دي قالتلي ف يوم هفضل جنبك..

قالت ماتخفش

العمر ما بينا طويل هنعيش..

قولتلها امين. وامتلتها

فضلت تجمعني عيون ليلا

وانا رايع جاي ...

بجمع ف الذكرى وأحوشها

املا ف الجاي

واديني اهو .. متساب ووحيد.

كل ديسمبر ييجي عليا بشتاق وبعيد كل كلامها

وبلم الفاضل م الفايت من كل ماضية ف ايامها

بقا يعني يا ورد...

هو ديسمبر

كان لازم يبقى على العشاق مركز للجرح ؟

ويللم طرح ف علاقتهم

ويسيبهم وحديهم ف الهو ؟
فيها ايه طب لو
كان سابتا لوحدا م الاول
من غير ما يجيب ناس تتجول
ف قلوبنا وبعدين يسيبونا !!
بقا عادي ياورد..
نفضل فاكرين ناس نسيونا ؟
الدمع يا ورد..
مش عايز حتى ف روحنا يجف
طب وانت يا ورد..
مش عايز حتى عليا ترد ؟!
وسايبني بفضفض مش مالك
غير اني اصحي وجع مكتوم

.....

يسند ع السور .. محني وبيقوم
كفه المكسور..
بيحطه ف جيبه ويتمشى زي المهزوم
مش لاقى لحل غير انه ينام
يفضل مع فيلم الحلم يعيش
أمله ان ديسمبر هذا العام
يخلص او حتى ياريت ما يجيش.

سنين وحشاك

فيه حاجات بتفوتك تدريجي
وحاجات بتفوتها وترميها
وحاجات تستنى انها تيجي
وحاجات عجبك بتخليها
حفظك تواريخ فاتت دايم
مشيك ف شوارع للذكرى
وحنينك للي انت فاكرها
مع انها ناسية ومش فاكرة
صورتك ف اعدادي وف الثانوي
وصحابك وجيمين بلياردوا
حصص الالعاب مع شقاوتكم
او شكلكوا وانتوا بتطردوا
حفظ القرآن مع تسميعه
وصلاتك جنب ابوك مرة
او لعبك جوة العربية
وتطلع ايدك من برة
اول تليفون جالك مثلا
وكتبت عليه نمرة قديمة
او اول فيلم انت دخلته
وقعدت ف بلكونة السیما
وشريط البوم لفؤاد ودياب
او بوجي وطمطم والادغال
وعدية ربع جنيه من الخال
واللدغة ف حرف السين والذال

ولراحة البال ولا حلامك ..
ولبصة عينك قدامك
وسنين وحشاك
تواريخ بتعيش و انت فاكرها
لكن نسيك.

وطن مكبوت

ضحك الخواجة بصوت ..
بعد انتشار الموت ..
رش السماد ع الوش
لنصور بيدوا بسلام
ارسم حمار على غصن
ابيض بدلوه بالاخضر
وانزل على الجماهير ..
بزئير وصوت عالي
وافتح بيبان الجهل
على شعبك الغالي
وديمقراطية ايه ؟
تسقط ياعم اسكت
كان الجمال ب جمال
رباني وكاريزما
وماعندهوش ازمة
غير ف الشباب الحر
فتح السجون بدل
كل الاراضي الخضراء
جاب السلاح من صحبته من الغرب
ماعاملش شئ غير انه خسر الحرب
موال يببدا لجل بيع العرض
ب الجوع ونومة المطحونين ع الارض
ابو جلايبة وبايب ..
مع بدلة بالكستور

يزعق ويتحكم ..
ويزيّف الدستور
يعلن بنصر الارض ..
والثغرة مرسومة
بعد اتفاق الغرب ..
الارض مقسومة
من غير كثير الغاز ..
هو اللي باع الغاز
والعدو اخدوا حبيب
سلمهم عرضنا ..
على ارض تل اييب
كرامتنا خدوها معاه ..
باعها لهم بأيديه
اخر المتمة اهوه ..
بقا اسمه مجني عليه
واللي استشار معاليه ...
خد نسبته التسعين
وعد انه يبقى امين ..
قام جمع الحاشية
العجلة والانتاج ..
وقفت ومش ماشية
والفقر بقا يزداد ..
والعبرة ف الفاشية
ينشر سموم المرض ..
والسم اصله خبيث
بدأ طبوله ترن ..
على نغمة التوريث

بس الوطن مستاء ..
من طعنة الجاني
واقف مع الصبيان ..
ع الجانب الثاني
علوا الهتاف ياولاد ..
الليلة دي الثورة
ثم اللي سرقوها ..
قالوا الهتاف عورة
جابوا العبيط الاهل ..
بسياسة التحريم
ماكانتش دقن رجال ..
كانت دقون ف حريم
جابه اللي قتلوا الناس ..
ف مراسم التكريم
وادي الوطن مزنوق ..
بين سلاح والدين
والجهل يدعي الفقر ..
والناس يقولوا امين
ولحد يوم .. 30
كتبولنا مسودة
الكذب تحت الدعم
من روسيا او جدة
قتلوا الهتاف فينا ..
ووطننا شوفتوا مريض
سفكوا الدماء ع الارض ..
بسياسة التفويض
ورجعنا تاني نعيد ..

اعلامنا بالتعريض
حكم النسور والكاب
زادوا المرار ف الوطن ..
على نغمة الارهاب
نهشونا بالاسباب ..
ولسان طويل كداب
يفتح علينا النار ..
لجل الوطن وانتوا ..
زودنا ف الاسعار
وبنينا اكبر سجن ..
وحبسنا ف الثوار
وعاهدنا اعدائنا ..
ان السلام هيكون
ارض الوطن هتهون ..
والبيعة مفتوحة
والحال كما هو ..
وبلدنا مجروحة
لسة السحاب اسود ..
والارض متبورة
بنمد على قدام ..
ويرجعونا لورا
والكل بي شاهد ..
ناتج وطن مكبوت
شاف الخواجة الفيلم
ضحك الخواجة بصوت.

عندي حالة من
العياط
عندي فويا الا
رتباط
عندي عاهة جوة
قلبي
مانعة عني الا

نہیات

السيرة

لو لسة فيك الحيل تقرا لي للاخر
قبل اما تقرا قصيدتي بص بعيد
اياك تبص لساعة المواعيد
واقرا القصيدة قراية متواصلة
لو كنت راكب لسة ف مواصلة
اقعد ف اخر كرسي ف المشروع
زيد هرمونات الدمع .. لو باقي لسة دموع
وان كنت قاعد ف الكافيه سارح
ف انسى ان ليك اتي .. وانسى معاه امبارح
سيب قهوتك تبرد ..
قبل اما تقرا قصيدتي وحروفها
ارسم معاك علشانها تكشيرة
السيرة كانت عنها من اول السيرة
الاسم مريم والصفة والروح
والبوح ف صوتها زي صوت الست
ندهت عليا ف اول السكة
شدت ايديا ف حضنها اتثبت
كان بينا ربط من البكا والفرح
كان بينا طرح وقسمة للأشياء
كان بينا داء اسمه الشغف دوقته
قدمت ليها الداء من حبها داقت
ضاقت علينا الدنيا سيبناها
ورسمنا دنيا بحبر متلون
لو زارني مرة الحزن

الاقبها بتهون
وان زارها مرة الحزن
احضنها يتلاشى
كان حبها اعاشة
احيا اللي مات فيا
وجروحي كانت نار
ف لقيتها مطفية

ان كنت ملتني .. ما تملنيش لسة
هنا كات بداية اخر القصة
هحكيلكوا عن نفسي
وانا نفسي مش ولا بد
من كتر خوف قلبي
لو شوفت شكله يخض
عيل صغير حلمه على ايده
كتر الدموع زودله تجاعيده
احلامي كانت غالية وبسيطة
ع الحيطه بكتب كل يوم اسمي
وبسبب ف جسمي تبوشه الايام
شايل على كتافي .. حمل اللي جاي كله
طبيت خاطر الزمن .. وسقاني من ذله
املك ف جيبي يادوب
مايكفي قوت اليوم
دوقت الشقا والصوم .. عن دنيتي الحلوة
الاها كانت ف الحياة غنوة
بتحلي همس الشقا .. اول ما زار ودني

عودني ابويا مانامش من غير عشا
من يوم ماسابني ومشى
وبقيت بنام فاضي ... وبقيت بنام راضي
ولقيت بنام بكتفي
كل اما اصاحب حد .. بيسييتي وببختفي
هذا انا ف موقفي
والدنيا مش بتساع
واحد عليل زيي
مالهوش سند ودراع
الفرح قالي وداع .. والحزن متمكن
وبرغم وجع الروح
كات هي بتسكن

خليني اكون واضح من بعد تعريفي
واحكيلكوا بس انها .. كات ورقة ف خريفي
وف يوم غريب مشهود
مالت عليا بملل
وقالتلي ايه العمل ؟
كونك ووحيد وكئييب
والحزن فيك بالغ
لا معاك ما يكفيني .. من فرح ومبالغ
ولا حتى عندك غير .. حلم اللي فيا اترسم
مالت بلا مبالة ... و فراق ف عينها اتحسم
وقالتلي انساني ..
انا قيمتي مش وياك
فيه حد تاني هناك ... انا عوزته وعاوزني
تقل الذهب وزني ..

وهداني ما شيئته
وادي الله ومشئته ..
واهوه كل شئ بنصيب
ودي اخر القصة
الاقبها ناوية تسبب
والا قبني انا الجاني
والا قبني فجأة كسبت
الجرح مجاني
وما خدش تسعيرة
كالعادة من ثاني ..
مع قفلة السيرة

امسح ف تكشيرتك
ارجع كما الاول
وانزل من المشروع
لو كنت هتطول
وامسح بقايا الدمع
لو فيه دموع وردت
دوق قهوتك على مهل
لو حتى كت بردت
وان كان ف هذا النص
شئ م الوجع والأه
وان كنت حسيته
ف ياريت تقول الله

أمر الهوا

أمر الهوا....
وقعني فيكي وشوفت عينك حور
شوفت الملائكة بتحرصك ..
واتجلى فيكي النور
الله
لفظ الجلالة ف حضرتك حاضر
و المسك عطرك ف الهوا بيفوح
لمسة ايديكي بتشفي اي جروح
وتزيد شرود الروح ف أوصافك
كعبة غرام قلبي اوام طافك
شافك وتر بيهز اركانه
اقسم بان الخلق لو كانوا
شافوا عنيك في بعينه ل ارتجفوا
زايدة الجمال ف الكون
والضحكة زايدة الشجن
انا كنت حر طليق
قلبك امرني اتسجن
مجنون وبمشي ف الطرق تايه
أمر الهوا ف عرفت فين سكتي
اهدي اليكي محبتي الصافية
يا كافية كل الموجودات ع الارض
لا اعرف طريق امشيه ..
ولا حتى املك جاه .
شوفتك حياه

شوفتك طريقتي ومقصدي لله
ونجاه من العلة ..
واماني والضلة
ولقيتك انتي الدوا
طول عمري وانا عاكف
جيتلك بامر الهوا.

تذكير الموت

بفتح ابواب الليل وافرد
جسمي العرقان
روحي اللي بترعش بردانة
رغم أن الصيف بيزيد ف حرارته على الأوضة
الضلمة تزيد ..
والدنيا بتتحول سودا
ف بغمض وبشوف العالم
من جزئي الخاص
واقف ع البحر
بشيكله همومي اللي رميتها
والدنيا بتفقد ف قيمتها..
والمشهد كله بيتغير
ف بشوف الحوت..
بالع يونس
ف بصرخ وماحدث سامع
بهرب وبروح اقرب جامع
دروايش الجامع تمنعني
مش عارف اتطمئن وانا شايف
الصبي خايف ..
موسى ما يملكش انه يعبر..
او يمنع حتى الخضر انه..
يبني لهم سور
اخدود محفور ..
والنار بتجمع ف الاطفال ..

اتنين اتنين
ياخدوني لمشهد لفلسطين
والقدس بتترجا النجدة
وبشوف على بعد
في صليب محفور
حواليه الجند
سامع من خلفي اصوات تسبيح
ومسيح على جسمه دماء طاهرة
يشبه لشهيد مات ف مظاهرة
وملايكة صفوف..
وعليه شاهدة
ارتاح واهدى
واسند ظهري على اقرب صخر
اصحاب الكهف ما قبل الموت
قاعدين يتسامروا بعلو الصوت
وكان هلاكهم كان نزوة
مديت عيني..
ف لمحت سيوف على حسب العلم
دي كت غزوة
حمزة مايعرفش ان انا جايلا ...
ف اتصاب بالسهم
من كتر الوهم..
انا فين .. ناسي
كان نفسي اشوف النبي مرة
بس انا عاصي
ماملكش غير
اني اهرب م الدنيا مع الاحلام

بفتح عيني...
على رنة صاحبي اللي نسيته
من قبل ما انا
ف بحسس على وشي واسمي
واستغفر ربنا واصلي
انا اصلا كل اللي حصلي
تذكير بالموت.

هذا أنا

شاور بايده عليا من على بعد
وندهلي فجاة ورحتلہ
ميل عليا وقالی قول....
فضفتله
کل اما افضفض ینحني
احکيله عني یبصلي
واحکيله عنها یبصله
الساعة عدت ...
والمكان خالي
وما فيش بشر غيره ..
قاعد مع حالي
اسرح واشوف ف عنيه
کیس الدموع بیخر
واسمع دماغه تقول :)
ما انا كنت قاعد حر ..
كان لازم اندهله ؟
دي جروحي کات خفت ..
وفتحها من جهله)
کملت ف کلامي
عن صاحبي قبل السفر ..
والحلم لما یفوت
عن ابویا وعن امي ..
عن معنی کلمة موت
عن صوت نجاه والونس

والدمعة لو تتكنس
بعد اما تبقى تراب
وسراب خيال اطياف
بيمروا من جنبي
ما انا برده مش ذنبي
هو اللي قال فضفض
وانا من زمان جدا ..
محتاج بحزني ابوح
20 سنة وانا اهوه ..
ب جروح تجيب ف جروح
من يوم ابويا ما مات ..
ولحد ما سابتني
ولحد ما صابتني
الدنيا بالوحدة
هذا انا
من تحت عقب القلب
كتر الدموع عملت
شياطين الروح
دخان بيطلع ع العيون
خلا الجفون سودا
موجودة روحي بس مقتولة
مجدولة بالايام المره والظالمة
كان نفسي اشوف النور
بس الحياة ضلمة
هذا انا
تقرير لحالة مشخصة
لمصاب بفوبيا الجاي

زي اني احلم
او اسير
هذا انا انسان اسير
لجمت جسمي بالاماكن ..
والقهاوي ..
والشطوط
وربطت نفسي بناس ...
قطعوا ما بينا خيوط
كان لسة فاضل شوط
م الفضفضة الفاضية
كان لسة هو بينحني
كل اما ابوحله بينحني
والكرسي بيه ييميل
بعد اما صابه الصدا
بصتله ولمحته ..
من كتر ما جرحته
كان مات من الفضفضة.

رصيف المرسى

قعدة رصيف المرسى غطتني
من بين ايدين الطل ع الزورقة
بفرد ايديا استشق النسمة
يمكن تطيب قلبي م الحرقه
غايبة يا سمش الامس والاتي
قاعد انا بالبحر بتسامر
عامر يا قلبي بكل شئ عامر
والطيبة زايده ف حسن ظن الغير
لساني بهوى السرمحة
م المرسى للقلعة
واخلع ف توب الزمن
كيف ما الحياة خالعة
برمي الوجع ف البحر
وبغني للدمعة
والصيادين مساكين
يشتادوا من دمعي
شوفت الملاذ للبرجواز
ف كافيه على البحري
شوفت الهوا مخنوق
شوفت العرق للشقيانين
على ترابيزات ف فاروق
او بنت بتعانق
صبي بالحلم على جسدا
داروا الغرام ف اليود

خايفين ليتحسدوا
مریت سنين بجراح ..
بقا ليا فيهم باع
ف صاحبت صخر الشط ...
هربا من الاوجاع
البحر وحده يساع
كم الوجع فيا
بتدارى م المخاليق
مع كل تمشية
وصنعت ليا صديق ..
ورميته ف الماية
واهوه كل يوم ع الحال ..
بغرق مع التفاصيل
واصنع ونس م الليل ..
ع الجرح بيعيني
وبكيت بصوت الان ..
رد الصدى غني
علمني موج البحر
ان البشر فترات ..
وان انعزالي براح
وان السنين سارقة ..
وان البكا جراح
والعمر حتى ان طال ..
بس الحياة واحدة
وان عشت فيه رحال ..
ف انا هرضى بالوحدة.

إن بعد العسر
إنتي
وإنتي يسرف
كل حال

هي

حزن البنات حكايات
مفتوحة م الجنبين
يشوفوها كل الخلق
من حزن بان ف العين
اما اللي بين ضحك الصبية وحزنها
فيه رقص ع الاوتار
طول النهار والليل
فيه شعرة بين سيل الدموع
والضحك دون
اسباب الاكتئاب
لو مسها بتحط مكياها
وتقص طول شعرها ..
وكانه منتاجها...
وياه تقص حاجات
لزمها م الماضي
بتداري خوفها بحسها العالي ..
وتطمئنك لو جوة روحها سكنت
وجع القلوب يشبه اوي البريود ...
الاتنين الم مكبوت
ناهشين ف جوف البنت
اعرف مثال لصبية كانت هنا
كات كل يوم بتلاعب العصافير
تأمل الدنيا وكأنها بتطير
وتبص ع الشارع

بعيون بتستني
ملاحها زي حورية م الجنة
نزلت على الدنيا
ف زادتھا بالتجاعيد
قولتلھا مرة احكي لي وانا هسمع
بدأت تتدمع
وبعنيھا تقول
كنا ف بداية الشتا ..
اول بيبان ايلول
كان يومھا لسة البحر
بيصفي اوراقه
خلط التسيم اليود
مع حضن عشاقه
كان الهوا صافي ..
والورد بيندي
وحضنت انا كفه ..
وحضني على خدي
واداني وعد صريح ..
بالجاي دون تجريح
ولا دمة تحضرنا ..
واداني وعد يكون ..
يعمل ضلوعه حصون
للحزن لو زارنا
سلم عليا بحضن ..
واخذنا بكرة معاد
كان انتظاره بشغف ..
ولكنه راح وماعاد

من بعد اول هجر
من يومها بستناه ..
حتى بزوغ الفجر
سألتنى هو الموت ..
ليه للاحبة عدو ؟
وسابتني مش عارف
من يومها براقبها
بتلاعب العصافير
تتأمل الدنيا وكأنها بتطير
وتبص ع الشارع
بعيون بتستنى
تخلط دموعها بضحك
وتشوفه ف الجنة
بتداري بالمكياج
علامات حنين ظاهرة
وتخبي بالضحكة ..
الحزن والقهرة
تمشي لمكان الهجر ..
وتروحه متزينه
ماسكة ف امل صدفه
وتشوفه يوم جاي هنا
وانا من ساعتها بخاف ...
افتح ببيان ف كلام
عن اي موت وفراق
وببص للدنيا
ببواطن الاشياء
ف بلاش بقا تشوفوا

الحاجة ب ظاهرها
واقروا الوجع ف البنت ..
لو كاتمة مشاعرها.

طفل التجاعيد

وقف الطبيب للطفل
ساعة ما اتولد .. قاله :
ايه اللي جابك هنا ؟ ...
غلطان أكيد يا حمار
حاول تموت دلوقت ...
او بدل الادوار
انا نفسي اكون عيل ..
مش عايز اكون شايب
الشعر فيا ابيض ..
وبقيت عجوز عايب
قضيت سنين ف عجاف
من دنيتي الساخرة
بندم عشان جيت هنا ..
واستعجل الاخرة
ضحك الجميع من صوت عياط الطفل
الا الطبيب اتأمله وعيط معاها
معنى الحياة
كان مختلف عنده
هذا الطبيب
اللي الزمن عانده
60 سنة وزادوا خمس
وكان مكان هذا الرضيع
60 سنة وازدادوا خمس
فاكر دموع عينه بالدمعة

وعاددهم من يوم ولادته
لحد موت روحه
فاكر جروحه ف مطلع العشرين
ودموع ليالي حنين
لحببية ف التربة
الغربة ف الثلاثين
ف شوارع الكربة
او امه لما المرض
زارها وهو بعيد
او نبته التجاعيد
على وشه ف الخمسين
هذا الطبيب خبرة ..
خد م الحياة عبرة
وكتير من الاهوال
من غير ولا أفادة
غير انه ف عيادة
عمال بينصح كل يوم
افواج جديدة ف دايرة الدنيا
وقف الجميع يتأملوا ف ثائية
ويشوف زيادة ف كل تجاعيده
مع كل طفل يبجي على ايده
تنبتله تجعية
الطفل كان ساكت ..
او قل من صيحته
لسة الطبيب
بينادي بنصيحته
ف عنيه البكا مكشوف

بص الطبيب للطفل
ف الطفل مات م الخوف.

صليت بامر الرب ..
ومشيت عشان الحلم ..
وبكيت عشان الخوف ..
فتحت لجل الشوف ..
غمضت لجل تنام...
وسهرت لجل الشوق ..
وزنيت مع الريكلام ..
عشمت روحك ليه ...
بأيادي اصحابك ...
وازاي واجهت الشوق..
لما الفراق صابك
حببت ف كام واحدة ..
ودخلت ف علاقة ..
ورسيت على الوحدة..
علشان مافيش طاقة..
غشيت تجارة الضحك ..
وكتمت كام دمعة ...
وعانيت كتير جدا ..
ف تدهور الاحوال ..
ولعبت ياما قمار ..
تعويض لنقص المال ..
وشربت خمرة كتير ..
تجديد لباقة الصبر ..
كل اللي فات دة حساب
هتشوفه جوة القبر.

محيائي و مماتي

لقيت موالد الاوليا اجمع ..
سكران بدور ع اللي ضلّنتي
الذكرى دمع نزفته ف اتبخر ..
نتجت سحابة ذكرى ضلّنتي
ماسك ف ايدي سبحتي وداير..
ف الحضرة سيرة وسيرتي كات انتي
مستني ريح ف حضرتي (طيفك ريحتك)
ولمحتك انتي بتضحكي ف الفكر
وسرحت فيكي نسيت..
انطق حروف الذكر
رتلت اسمك وارتوت روحي
حسيت ساعتها اني لقيت راحتي
فضوا المجالس فجأة وانفضوا
بصيت اشوفك... كنتي روحتي
وانا مش عليل والله
والعلة اني هويتك
والهوا غلاب
خلاني بقصد باب الاوليا لجلك
ازهد عن الدنيا
ولكني بحتاجلك
بحتاج امان عينك ..
او حضن حنية
محتاج لوصل قريب ..
يا ساكنة ف النية

بسم اللي كان ..
واسم المكان
واسم الزمان
ف زمان كان بيننا قبل فراق
ببعت اليكي سلام
متعبي بالاشواق
حرب الحنين جويا لم تحترم
لا سكوني ف السجدة ..
ولا ف شهور الحرم
مهما اصوم واعتكف ..
قلبي الحزين يرتجف
يبكي مع التواشيح
ارفع ايديا لفوق ..
وابكي ف حزن ضريح
وادعي لرب السما ..
ليردني ليكي
اسأل عليكى بياعين الحب
واسال عليكى نجوم سما ..
ف ليالي كاملة البدر
واتمنى اكون الخضر ..
واعرف طريقك فين
الفين نهار غايبة
وانا ف الهوا ناسك
ماسك ف ايدي سبحتي ودائير
لفيت موالد الاوليا حاير
محتاج وصالك .. يكتمل ذاتي
اوهب اليكي النسك ..

محيائي ومماتي
شئتني وابيتني عن الغرام فيا
فيا الغرام ساكن ولا يختل
انا كنت ساكت راضي بالوحدة
اول ما حبك حضر
سكن الوريد واحتل
وفضلت طول الوقت
باخذ وعود واوعدك
وماكانش ف الحسبان ..
ان الفراق يبعدك
والخوف يموتني
ولا اني افضل كدة ..
سكران بدور ع اللي ضلتنني.

فرط أحزاني

احسنت فيكي الظن
او ان نظري كان ضعيف
وماشوفتكيش عن قرب
مديتي ايدك بالسلام مديت
ومشيتي ليا بس انا مديت
صليت عشانك بس ما اتوضيت ..
اللمسة منك طهر في ذاتها
او اني يوم احسنت فيكي الظن
انا مش مسيح لكن معايا العهد ..
ممکن اخلص اي قلب جريح
وابعت نصايح يضحكوا عليها
وارجع ف اخر الفضفضة مصلوب
ما اطلبش شئ من حد
لكن بكون مطلوب
مصحوب .. وناقص حتى ف الصحبة
صباح بلوم الصبح لمجيئوا
علشان كرهت المعرفة بزيفها
انا كنت شجرة وانتوا خاريفها
احسنت فيكوا الظن ..
ورجعت انا المبتلى
قلبي بمراره اتملا ..
ومافضيتوش مره
الصبر اعنف لعبة تلعبها
والشك ممكن يسحبك للنار

محبوس ف اوضة قريبة من الغار
والوحدة خير جليس
و رفيقي كان ابليس....
قسم معايا الذنب واستكبر
لكن انا طيب .. وتملي بستغفر
او ممكن ابكي لربنا عادي ..
واسجد بقصد القرب
وارسم صليب ع الحيط ..
بس المهم اني ...
طيب وبستغفر كثير
الحب رزق البشر ..
وانا عشت منه فقير
ويادوب بلقط رزقي ف النظرات
او بسمه حلوة ف شفة ما اعرفهاش
او غنوة حلوة تزيد القلب ب النشوة
اشهد بانني بعرف اتبسم ..
وارسم امل من غير ما اشوف شكله
واشهد بان اليأس زي الديب
لو شاف ف يوم حلمي
يجري اوام ياكله
واشهد بانني شوفت مرة الضي
ونداني قولت انا جاي
والحزن اغراني
احسنت فيكوا الظن
انتي .. وهما ..
وذنبى مع ابليس
والوحدة شر جليس

هديتوا فيا بس انا الجاني
واشهد باني كنت شخص سعيد
ماتت سعادتي بفرط احزائي.

عم عادل

عم عادل ..
شخص ناضل
لجل لقمة عيش هنية
كان بيحمد ربه دايمًا
ع اللي فاضل م المهيمة
عم عادل مرة جادل
عم منعم ع اللي حاصل
عم منعم شخص واصل
قام رافعله كام قضية
عم عادل كان مفلس
من مرتب 300
خدله حبس بظلم باين
لجل قال انه الضحية
ساب مراته وبنته عليا
وابن بنته وابنه سامي
والفلوس اللي حيلتهم
خدها سامح بيه المحامي
عم عادل خد برأة
والمراقبة 4 شهور
بس قضى العمر ساكت
لجل تسيير الامور
شغله راح والبيت مفلس
حتى من حق الايجار
عم عادل شوفته قاعد

ف الشوارع ليل نهار
عم منعـم كان معدي
عينه بتبص بشماتة
لما شاف عادل بيـقعد
ف الشوارع للشحاتة.

غير قابل للمزيكا

كل التراكات
بتروح مع روحك لجروحك
تفضل مع روحك تسمعها
اخرتها بتلقى ان جروحك
حتى المزيكا ما بتساعها
مكشوف قدام ايام عمرك
بال سنتي ومتحدد بخطوط
شوف ليك كام يوم عمال بتفوت
على نفس الشارع والقهوة
شوف ليك كام يوم لسة بتهوى
تسمع ف اغاني ما بتحسكش
بتحب ف واحدة ما بتحسكش
وبتكذب على نفسك دايمًا ..
انها عايزاك وانها فاكراك
وان انت معاك ذكرى شايلها
مش ممكن ابدأ تنساها
شكل الدبدوب اللي معاها
ريحة البرفان جوة الورد
والفص الفضة اللي معاها
كل التراكات
اللي انت بتفضل تسمعها
هي بتنساك مش سمعها
جربت تفوق ... والشوق غلاب
وخصوصا مع واحد متساب

ووحيد مالهوش انسان ياويه
فيه كلام جواك نفسك تحكيه
ف بتلجأة على طول لمرايتك
ومرايتك ب الاحساس صامه
بتعيط وتقول انا نفسي
حد يخبيني ف روح ضمة
وبقيت بتخاف اوي م الضلمة
علشان بتعري كلام روحك
محتاج تصريح او سكة لبار
مليان مجاريح بيكبوا الشوق
على كاس خمره
شايفين العالم دة مؤامرة
عايشين ف سلام
بتخاف لتنام ..
وتشوفها ف حلم ب فستانها
كالعادة بتفضل ف مكانها
وانت اللي تشد
ووصل لحد انك كاره
نظرات الناس على ضعف عنيك
فضفضت لكam انسان منهم
وسابوك محتاس
حرمت تفضفض خوف م الناس
او تشكي لحد على غيابها
وخسرت شبابك لشبابها
ومافيش جواك اي مكاسب
كل التراكات
مابقتش لوجعك بتناسب

فاقد احساسك بالاشياء
من يوم احساسك بفراقها
انما هي
يوميا شلة عشاقها
حواليها بيفرحوا بهزارها
لو بس رجعت لنفسك يوم
هتقول كان لازم تخسرها
ايه اللي اللي بقتك دلوقتي
تفكيرك اصبح متهالك
صدقني ان كانت باقية عليك
هتشوفها ضعيفة وجيالك
بطل تستهلك بقا روحك
دة مافيش غير روحك بقيالك.

من آخر جزء ف حكايتنا

من آخر جزء ف حكايتنا
بكتبك وانا مهموم بيكي
والهم مش المقصود جرحي
انا جرحي اتزود بأديكي
وانا خدت عليه ..
وبقيت عادي
متعود اعيط وانا راضي
اهوه حاجة بخرج بيها كلام
على شكل دموع
من آخر جزء ف حكايتنا ..
بكتبك وانا مش قصدي رجوع
حببت اتظمن على حالك
واعرف اخبارك ومشاكلك ..
وازاي لون شعرك دلوقتي؟
مكياجك .. كحللك .. او شكلك !
او حتى حبيبك من بعدي ..
ازاي سيبتيه ؟
طب لما تنامي بتحلمي بيا ؟
ولا بقيتي بتحلمي بيه ؟
خدي مني كلامي وف الاخر
انا همشي ومش عايز لحلول
مش قصدي ان افتح جرح قديم
ده بس فضول
او مش هكدب...

انا مشتاقلك بس بخبي ...
علشان متأكد من ظني ...
ان انتي لا يمكن هتحسي
ما انا ياما سهرت ومحتاجلك ..
اما انتي بغيري بتتمسي
انا مش نفسي
غير بس اني أفضض بحاجات...
بالنسبة لقلبك مش هامة -
اولهم اني ضعفت كتير ..
بس انتي ماكنتيش مهتمة -
وتانيهم انا قلبي ف غيبتك ..
بقا صعب يفتح ف مسامه
كل اما يبص لعين واحدة ..
مش شايف غيرك قدامه -
وتالتهم ف النسيان يعني
كل اما بفكر أنساكي ...
تفكيرى بيقصد يوجعني
والذكرى ان حضرت مع يوليو
من تاني لحزني ترجعني
كل دة ذنبي
سلمتك قلبي بكل مافيه ..
كان املي ان انتي تكوني جنبى
دلوقتي ماليش ..
غير بحر الوحده اللي بعومه
وانا قلبي غريق بعمل مبسوط ..
وانا روحي ف ضيق
مش هكذب برده اني بدور

على اي طريق ارجعلك بيه
ولا هكذب ان انا يوميا
بدخل بروفايلك واتصنت
و ببص لصورتك واتحنط
وافضل اعيط ..
من غير اسباب
هذا بدون علمك وبدونك....
من بعد غياب
من اخر جزء ف حكايتنا
انتي وحيدة ..
يمكن حواليك صحاب ياما
وشلة جديدة بس وحيدة
والوحدة ماهياش بالياما ..
الوحدة نفوس فيها علامة
مش لاقية لحد جديد يهتم
وانا ياما اديتك واهتميت
من قلبي عملت لقلبك بيت
والله حبييتي كمان حبيت ..
ولهذا الوقت بقولها بجد....
مش هقدر احب ف حبك حد
ولا قلبي يساع ابدًا غيرك
من اخر جزء ف حكايتنا
كتر خيرك ..
ماقصدش اصحي وجع فايت
انا لسة ب دمع الليل بايت
بشتاقلك اكتر من روحي
حبيت اكتبلك عن حالي

من كتر ما بكتم ف جروحي
ومن كتر التيه
بكتبك ف كلام وانا عارف ..
مش راح تقريه.

عرفان واجب

دلوقتي اقدر اقولكم ..
اني لكم او باختصار ..
الانتظار ما بقاش يفيد
او انها ..
لمت بواقي عفشها مني
اخذت معاها الليل ..
والباقي من سني
اخذت معاها الروح ..
مع صورة مكسورة
ورصيف محطة مصر ..
وكتاب من الذكرى
اخذت كمان بكرة ..
وحاجات من الاحلام
دلوقتي اقدر اقولكم ..
اني لكم من غير كلام
جاي بستجير بيوكم ..
والشعر بقا كفني
ان مت غطوني ..
برسايلي لعيونها
وان عشت سامحوني ..
على كسرتي بدونها
وان شوفتوا شكل الدمع ..
ف ما تمسحوش خدي
عدي على ترتبتي

على كرسي ف القهوة
شوف الوجع سهوة ...
واضحك على بكايا
وارسم معايا طموح لكن كداب
او سيب مساحة لقصتي ف كتاب
تذكر عذاب الوحدة ف الايام
دلوقتي اقدر اقواكم اني هنام
من غير امل ف رجوع
ولا فيضي ف مشاعر
قولوا الغريب انه ..
ساذج لكن شاعر
وافي لكن زاهد ..
صافي لكن شائب
حالم لكن واهم ..
ماطلعش يوم قدام
مروا على وحدتي ..
وارموا عليا سلام
واياكوا م الطبطة ..
او اي شئ م الزعل
هذا الوجع مفتعل..
من قصة المفعول
وان كان بأيذكوا حلول ..
ف متخلوش بيها
هي مش اكثر من خيال عدا
وسابت اثرها شعر مش مادة
بكتلها مشتاق من غير ما بغتابها
عارف ماهيش راجعة ..

وامنت بغياها
ببعتلها العرفان
والامتنان والشكر
وابعتلها على ذكر
اخر لقا بينا...
واخر سلام بعناق
اخر سلام ف فراق
طالع بتنهيده
ببعتلها العرفان ..
مكتوب على قصيدة)))
لو شوفتي يوما ما ...
على يافطة كان اسمي
بصيلي وابتسمي ...
قولي انا الملهمة
قولي انا اللي بنيت ..
اسمه عشان يبقى
قولي انا الأبقى ..
والشعر عنده مجاز
بصي عليا باعتزاز ..
وبلاش تسيبي الندم ..
في اللحظة دي يزورك
كوني على ادارك ..
ان القصايد كلها حضورك
وان انتي باقية
وان انا الفاني))
دلوقتي اقدر اقولكم تاني
اقرؤا الوجد فوق السطور محفور

واقروني ف الاشعار
كائن ضعيف مكسور
وبكتب بلا جدوى ..
بكتب بلا تصديق
ما املكش غير وحدتي..
والشعر ليا صديق.

الشعر نور

عمري يجوز ..
عدد القلم ما خط ف كتابتي
ما خط ف كأبتي ..
ما خط ف الاوصاف
من غير حساب ولا عدد ..
الشعر عدادي
ان جوعت يوم
تبقى الحروف زادي
وان دمي سال
تلقوا الحروف سيللي
وان جيت ف يوم حبيت ..
ووقعت ك صيدة
هدفعلها مهرها
رباعية و قصيدة
وان زارني ملك الموت ..
لو جاي على غفلة
راح اقلوه صبرك بس..
سيبني اكتب القفلة
بعدين نشوف الموت ..
ووصية يا اهل الشعر ..
ان مت...
عايز امسية بدل الصوان
ويعزي فيا الشعرا
من سينا الى اسوان

انا بعث نفسي اليه
والشعر بقا صفتي
عايش بخطي بالقلم حرفي
بنزف دموع الحزن والافراح
لا يهمني فضا جيبي م الجنيهات
ولا حتى فين راح ابات ..
ولا وحدتي وناسي
يكفي اني ليا الشعر
بديله احساسني
اكتب عليل الوطن ..
واكتبني ف الوحدة
والعن ف حوا ان كان ..
الجرح من واحدة
واوصف جمال حسنھا ..
لو طابت البصة
وان يوم كتمت السر ..
الشعر ما يخبي
ماسك حبال ومعايا متنبني
برمي السلام وانا جاي
على حافظ ابنودي
يسرد للوطن حافظ
بيرم ورامي بيندهوا
لجميل نجم يقابلني
واحس حضنه جميل
اخذ معايا الراية دي لمصطفى
الشعر نور يرسم طريق الجاي
والتجربة عايشة ...

ما تخلیه‌وش ینطفی.

الفهرس

الإهداء	2
آخر مطر ف باريس	5
مسيبتش حاجه للذكرى	9
المذبحة	14
جوانا طيابة	19
عشق صافي	21
بقيت داير	24
ورد ديسمبر	26
سنين وحشاك	29
وطن مكبوت	31
السيرة	36
أمر الهوا	40
تذكير بالموت	42
هذا أنا	45
رصيف المرسى	48
هيَ	51
طفل التجاعيد	

	55
59	محيائي ومماتي
62	فرط أحزائي
65	عم عادل
67	غير قابل للمزيكا
.....	من آخر جزء ف حكايتنا
	70
74	عرفان واجب
78.....	الشعر نور